

商水縣志卷二十

人物志四

隱逸

後漢

周勰字巨勝舉子也少尚玄虛以父任爲郎自免歸家父故吏河南召夔爲郡將卑身降禮致敬於勰勰恥交報之因杜門自絕後太守舉孝廉復以疾去時梁冀貴盛被其徵命者莫敢不應唯勰前後三辟竟不能屈後舉賢良方正不應又公車徵玄纁備禮固辭廢疾常隱處竄身慕老聃清淨杜絕人事巷生荆棘十有餘歲至延熹二年乃開門延賓游談宴樂及秋而梁冀誅年終而勰卒時年五十蔡邕以爲知命自勰曾祖父揚至勰孫恂六世一身皆知名士

後漢書本傳

商水縣志

卷二十

人物志

一

袁閔字夏甫彭之孫也少勵操行苦身修節父賀爲彭城相閔往省謁變名姓徒行無旅旣至府門連日吏不爲通會阿母出見閔驚入白夫人乃密呼見旣而辭去賀遣車送之閔稱眩疾不肯乘反郡界無知者及賀卒郡閔兄弟迎喪不受賻贈衰經扶柩冒犯寒露體貌枯毀手足血流見者莫不傷之服闋累徵聘舉召皆不應居處側陋以耕學爲業從父逢隗並貴盛數饋之無所受閔見時方險亂而家門富盛常對兄弟歎曰吾先公福祚後世不能以德守之而競爲驕奢與亂世爭權此卽晉之三郤矣延熹末黨事將作閔遂散髮絕世欲投迹深林以母老不宜遠遁乃築土室四周於庭不爲戶自牖納飲食而已旦於室中東向拜母母思閔時往就視母去便自掩閉兄弟妻子莫得見也及母歿不爲制服設位時莫能名或以爲狂生潛身十八

年黃巾賊起攻沒郡縣百姓驚散閱誦經不移賊相約語不入其閭鄉人就閔避難皆得全免年五十七卒於土室二弟忠弘節操皆亞於閔忠字正甫與同郡范滂爲友俱執黨事得釋語在滂傳初平中爲沛相乘輦車到官以清亮稱及天下大亂忠棄官客會稽上虞一見太守王朗徒從整飾心嫌之遂稱病自絕後孫策破會稽忠等浮海南投交趾獻帝都許徵爲衛尉未到卒弘字邵甫恥其門族貴證乃變姓名徒步師門不應徵辟終於家

後漢書本傳

義行

明

顧珠崇尚禮義好善恤貧齒德重鄉里萬曆癸未出貲創建玉皇閣又施地十畝建修書院講堂齋舍器具經費皆自任之妻魏

商水縣志

卷二十

人物志

二

氏子麒樂善好施能繼其志

據玉皇閣碑補

郭琇萬曆二十一年大饑琇輸銀二十兩倡賑知縣郭天璟匾其門曰助義最先

李時馨中書舍人萬曆四十六年邊兵乏餉詔諭民間輸助馨首先輸銀二百兩特敕褒獎

劉芳河間府通判輸銀五十兩助餉兵備道特賜獎薦有曰大人正己赤子存心秋月寒潭三載促車高馬骨衡門泌水幾年野外卧羊裘等語

清

李玘庠生順治十四年巡撫暨道憲票積穀備賑玘首先輸穀一百石巡道于朋舉給匾曰俠烈空羣

王進賢順治十四年輸穀五十石備賑巡道于朋舉匾其門曰義

俠空羣

劉人傑庠生性慷慨尚義周貧卹孤人多沐其惠澤尤好修補橋路不惜巨費髦而不倦一時有耆英之譽知縣王夔龍表其門曰達尊有二

李銘監生候選州同性倜儻輕財好施弟錦有同心焉周口南岸河隄薄削欲培築無處取土每河水暴漲隄外盡屬波濤幾至衝決銘慨捐瀕河膏壤五十畝運土覆隄始得保全無虞一危於康熙五十七年知縣黃廷獻築之再危於雍正元年知縣吳耀築之全活一鎮生靈微夫人之力不及此鎮人至今誦德現歸其裔孫李鰲掌管猶取土如昨云

據採訪稿增刪

李振字伯成候選州同爲人忠厚謙謹磊落仗義康熙四十八年河伯肆虐麥秋俱沒明年春十室九空人食樹皮草根流離逃

商水縣志

卷二十

人物志

三

散者十有八九振以雜糧四百餘石賑卹之周口市民及親族沐其惠者數百家一時翕然頌其遺愛開封府丞王匾其門曰博愛可風

李化龍字羽天候選經歷尚義氣好周人急難親族鄉里多沐其德惠橋梁廟宇有頽圯者輒捐貲倡修樂善好施年垂八十猶孜孜不輟

李率性字含真庠生慷慨尚義尤篤一本之愛明季賦稅煩重族人迫於追呼競以文契投率性鬻田爲納稅計率性憫其艱苦周全之事已召鬻田者悉焚其券以原產與之衆堅辭不受率性曰予豈圖若產爲若輸稅保業耳忍復累我子孫耶衆感泣受田而去佃人掘地得金同事以告率性曰土中物我何有焉置不問好讀書雖兵荒未嘗釋卷人或以書癖嘲之者不顧呶

唔自若清初補增廣生從遊者甚衆子公晉邑庠生公猷領歲薦書香綿綿皆義方之訓也

李桂芳字月樵例貢家素封雅敦義禮父和春嘗捐千金修周口板橋桂芳承先志歲有補葺雍正元年河決滎陽水南駛西華諸河泛溢渚水尤險桂芳躬率僕佃伐莊柳數百株草鉅萬斤增高培薄隄防完固鄉人賴之四年饑凡親佃積欠累千餘金悉焚其券又於東馬坡立漏澤園以招集臨潼流民授知縣未

仕而卒

據李氏譜補

郭定字靜子監生爲人謙厚儉約嘗捐修廣惠堂銀五十兩總督王給匾曰克和厥中

王泰峯字東岩捐入廣惠堂地基一段

王彝常歲貢性純孝好讀書有敏才試輒前矛與人交尙義氣善

商水縣志

卷二十

人物志

四

排難解紛親族有雀角之爭必曲爲勸諭卒各釋然而去被其福者多翕然頌之

韓養位耆民常築隄捍水勤勞有功知縣李新猷匾其門曰齒德

兼隆

李檀武庠生捐修廣惠堂銀五十兩總督王給匾旌之曰維德之

基

上五人舊志選舉志注

李文先家貧好善專以利人濟物爲心橋廟有頽圯者輒募化以修葺之常科頭跣足雖盛暑嚴寒不知其苦又化導同人王曰武等共成善果俗謂之李善人

王文字華國庠生尙氣節善排難解紛不避物議里有鬻女者文捐貲贖之令與本夫成禮又代贖楊姓之妻俾爲良人其仗義大率類此

徐珠忠厚醇良嘗修朱洪橋以便行旅施棺木掩枯骨遇乞丐則贍給之其慷慨樂施類如此

王廣運字介庵增生性耿介動循禮法慷慨好周人急難與人交然諾不侵嘗以成就後學爲己任遇親族子弟輒諄諄以力行勤學相勸勉人多率從之尤精岐黃術有求醫者雖嚴寒盛暑不辭勞瘁必期病痊而後已人或以微物相酌謝輒厲色拒之至貧不能醫者施以藥雖金石不求值里有柴姓無子一女忽得危症延廣運診視曰此證九死一生度爾家貧無力服藥服亦罔濟柴夫婦驚糧痛哭跪懇不已廣運感動自出藥醫之日兩診視調理兩月始愈計所服藥約值五十金柴感激令女拜廣運爲父又楚人李某貿易失資落魄不能歸抑鬱憤懣遂患癱證匍匐乞食遇廣運詢之故憐之診其脈曰此證尚可醫何

商水縣志

卷二十

人物志

五

成廢疾遂留至家投以藥輒效未幾能自立月餘行步健如初李大感泣叩謝廣運勸之歸贈以川資其他神妙不可殫述所著有十二經絡鍼灸秘法及仲景傷寒論注解行於世子怡庠生能世其業

舊志二傳
今合爲一

李震興字曉同監生慷慨好施乾隆四年秋黃水初退捐給貧民麥種百石知縣李新猷修義塾成無歎延師兄震普慨出百金成其事五年震普沒震興與從弟郊姪樹勲復繼其志歲捐百金作養人材又捐鬢宮祭器供棹書櫃等件河南巡撫雅爾圖獎以經久良圖惠遺久遠綽楔

據李氏譜補

左國榮性好濟人善募化修補橋路沙埠口固墻石橋皆其力也王育儉雍正元年修連家石橋乾隆元年修界溝河磚橋南北大

路六年報賞銀牌

下至趙鳳翔
皆查卷補

王士祿乾隆五年與李文光修青龍溝靈家橋獎銀牌

王棠修三阮橋一座

許元臣乾隆五年修四科柳樹橋一座

李德純捐料修青龍溝土橋并大路乾隆六年賞銀牌

午忠實周卹貧鄰又捐修本村西北青龍溝橋二座乾隆六年賞

銀牌

魏陸奇好善樂施嘗倡義修喬家坡南北大路并橋二座乾隆六年縣賞銀牌

張學周好善不倦嘗倡捐重修李家石橋又李橋北坡溝石橋并修築南北大路乾隆六年年八十一猶令子孫於橋路歲時修補縣賞銀牌以獎之

顧三重素行端正乾隆六年同顧有福顧良棟倡義創修陳小胡

商水縣志

卷二十

人物志

六

家坡汾河石橋得獎銀牌

李進賢時大行捐施義地張舉同修橋連鳳化濟人趙鳳翔謙和皆由縣賞給銀牌

李廉襄庠生睦族濟貧鄰鄉有婚葬力不給者輒捐貲助之又捐入廣惠堂銀五十兩以養貧民

王光智好善積德修補橋路掩暴骨鄉里稱曰王善人

以上舊志

李郡字會周貢生候選通判性慷慨好施乾隆年間黃水泛濫郡僱船載粟米糗糧賑濟難民賈魯河堤薄削稟明太守興工督修自周家口至李方口十餘里增高培薄至今水不爲災鄰村彭埠口偶遭回祿沿村數十家悉爲灰燼郡慨出已財代爲修房數百間擇尤貧者給以衣食其他設義塾施藥餌捨棺木諸善舉未能殫述乾隆八年淮甯知縣許佩璜贈以名著題輿匾

額十九年太守高士鏞褒嘉尚義可風子樹仁候選知府樹義
布政司理問好善樂施有父風孫樽天姿聰敏少負奇氣喜書
史工詩詞著有方壺詩草惜天不永年曾孫鍾璧鍾瑜俱恩貢
生入淮甯籍

李秉仁字德厚監生候選州同震昇孫也謙和純厚無驕吝態嘗
倡修臨川橋築褚河堤和睦親族賑濟貧苦輕財重義乾隆三
十年公製惠周閭里匾榜其門子八人均有聲望松峯松筠尤
著

李盤字蕙圃幼承庭訓卽專志讀書不出戶庭長而莊嚴幽靜獨
處衣冠必整早年蜚聲譽序乾隆甲寅恩科舉人不求仕進好
施予鄉鄰有急周給之不責償遇公益事捐貲贊助白帝堤險
倡建外堤俾無衝決之患枯河以北地勢卑窪每遇夏秋坡水
泛濫田禾盡淹盤倡修五里長堤於大蓮湖東障坡水入枯河
復疏瀹之使水流暢永無滯塞潰決之患又建議疏通棄兒溝
取淤作堤使枯河以南坡水由溝注汾事不果而卒至今世受
水患鄉論惜之

周本章字明善性剛勇精拳棒年三十承從叔名臣嗣乾隆間歲
大饑餓殍遍野本章以家貧親老隻身往來汝蔡間販米得餘
以奉甘旨自與妻子食糜度荒一日歸至洪橋羣盜劫之本章
連斃數盜一方平靖行人德之子二紹安紹宗

張元亮字永年監生家小康仗義疎財嘉慶十八年歲饑元亮以
倉穀濟貧村鄰均沾其惠

李維緯字煥章松峯次子好義急公嘉慶間松峯嘗欲將臨川橋
椿易以石未果而歿維緯仰承父志倡首續修偕姪轟公慨施

百金入山購石數往返日夜經理不辭勞瘁又增築王埠口沙河堤歲修李大莊坡北曲坊公私便之

牛長錫字子貺灌園爲業有客飲馬井側遺白金百兩長錫追之不及掘地藏之逾年客復至謂曰叟有財而猶爲圃乎長錫怪問之知爲遺金者復掘出還之客固不受長錫曰君物也將誰歸客爲立碑以彰其義嘉慶十六年八月二十一日事也

杜林祥性純樸好施予道光年間重修巴村橋林祥勸捐外又捐已貲八十緡一時同事者如賈恭修惠景元日夜督工六載不懈鄉里至今皆爭道之

王榮先性忍讓仗義疎財道光間歲饑榮先破產二百畝周恤親族子連元恪守家法兄弟怡怡孫學修篤實好善早歲入庠

張育萬字霖蒼道光十四年設立大義塾在蔡境遵治里並於安

商水縣志

卷二十

人物志

八

化里設小義塾共施學田蔡弓地一頃零七畝

符伯元字長善監生恂恂忠厚遇事有膽略善持家不積私財咸豐間率家人族衆逃難爲賊所困幾遇害伯元義氣凜凜冒矢石向賊婉說卒得保全邑侯汪奉飭抽丁輪流解餉伯元與王守成請先往

王守成字待學家素封無驕侈態讀書未售納粟入成均恪遵矩矱克敦內行宗族鄉黨咸以孝友稱咸豐間捻匪亂作守成聯絡本村少年嚴守禦復指困濟貧以結其心邑侯汪公奉憲札按戶抽丁輪流解餉守成首先請往與里人符伯元冒矢前驅卒無敗事光緒間設塾延師裁成後進友人借貸不索償子孫入邑庠者數人

王應魁字占鰲性慈愛濟人疾苦凡建造橋梁多所勸募如雙橋

黃冲龍塘河諸工皆應魁倡修道光間以積善餘慶旌其門
李興遠字永庵每逢歲歉周濟鄉里道光十八年大饑鄰人崔月
鸞妻已得半價興遠聞之助以貲使崔退回又給豆五斗俾爲
生理崔後生二子夫婦感戴終身興遠壽九十二六子文華入
邑庠長孫蘭升貢成均孫曾濟濟非爲善之報歟

葉含秀監貢仗義輕財咸豐間捻匪猖獗含秀愴懷時艱倡修鄧
城寨捐錢一千餘緡樹三百餘株養工役百數十人五越月計
費貲財三千之多四鄉感德至今稱頌

姚萬興監貢生家素封凡親鄰借貸無不慨許一生三焚借券約
萬餘緡壽七十八子孫昌盛家業不墜鄉里咸謂樂施之報
王丕承字紀周監生家素封咸豐丁巳歲饑族鄰貧者恐其流離
失所出雜糧數十石賑卹之衆感其義匾諸門曰槐蔭普照

商水縣志

卷二十

人物志

九

劉松嶺樂善好施遠邇被德咸同間捻匪過村大肆焚掠其黨相
語曰此劉善人家也不可殘害合村被災松嶺宅獨全

葉慶雲候補知府家素封仗義疎財邑修試院捐錢五百緡咸同
之亂倡修鄧城寨獨修炮樓費錢七百緡一方賴以保全

李臣賢性仁厚憐貧恤幼咸豐間有族女父母雙亡孤弱無依臣
賢收爲己女撫育成入爲之擇配往來甚密

鄧太平監生好推解濟人利物事毅然任之咸豐間捻匪猖獗太
平邀集村鄰倡修田復寨一方賴以保全當督工在局夜夢古
衣冠人謂曰爾數難免此劫因爾急公好義寨成增壽十年醒
與同事王雙泰等述之後有疾促家人備身後事太息曰自寨
修成已及十年昔日之夢或成讖語無何果卒

楊丙申家頗殷實好周濟貧乏咸豐年間西平舞陽一帶人民多

爲捻匪所虜後蒙倪憲剿除凡被虜得歸者過此寒則衣之飢則食之如是數月毫無德色

王峻嶺監生爲人正直修橋墊路樂捐好施知縣劉知其廉謹飭修八蜡廟專任其事峻嶺朝夕督修月餘工竣

許濂堂字振頑附生習岐黃術施眼藥二十餘年子國鳳孫光禹曾孫體身世其業四世同堂濂堂壽八十九而終

葉廷莅監生鄧城南門當衝道車齧水冲每當陰雨車不能行廷莅倡首修補慨捐百緡衆皆感激相助修成石路

屠以德持己莊嚴接人謙恭雖極貧賤皆敬禮之又急公好義邑中善舉無不捐貲力助創修試院勤勞卓著知縣葉賜匾曰積功勵學嘗畜二騾車夫竊以去及追回不加責問復給路費使他往卽此一端足徵厚德宜乎子孫昌盛矣

商水縣志

卷二十

人物志

十

李雲彩性好施濟遇事有遠謀咸豐九年鄉團攻捻匪於任橋坡雲彩料團衆必敗預僱舟於韓灣及敗歸衆得渡免溺爲德大矣

顧九德字善萃附生應東子性慷慨咸豐間捻匪擾亂鄉鄰流離失所者繹絡於路九德夫婦造粥食之如此數月同治四年創修東口頭寨至六年始成九德董其事心力俱瘁計助貲一千五百餘緡子安國貢生亦好義急公

任萬榮字春臺武舉任奎長子咸豐間髮匪犯周鎮萬榮與候選訓導袁錫齡監生張鳳鳴庠生王蔚東武生王廷勳增生楊駿把總李慶雲貢生李穎名廩貢何熙宸暨弟萬里諸紳創辦周口南岸豫防局修寨養勇甚資得上憲屢褒獎之

李維均字智錫監生好義樂施道光二十三年黃水爲災又陰雨

兼旬邑東馬坡卑窪數年不涸維均創議開溝洩水旋因匪亂未果同治初自衛莊後開溝至康家橋入渚河并建閘口以資啟閉一方利之又捐資修三里橋李家橋及渚河兩岸廟宇鄉里有爭維均至片言即解弟維享字壽山持躬方正族鄰多嚴憚之精醫術貧者并給以藥兄弟均壽八十餘

傅懷林字棲霞性恂謹咸豐間監築城垣助官守禦知縣汪嘉其勤勞由從九保獎五品銜

胡存功字懋勛把總銜加五品藍翎勇於爲善咸豐七年周口被兵議分修南寨存功日夜監督不辭勞瘁嘗於風雪中勸慰衆工極力進行工竣人得安居亂定又監修張公祠善排解鄰人趙某妻虐待其媳媳計窮投水存功救出之戒勸備至姑媳感悟和好以終至今趙氏猶銘其德不忘

商水縣志

卷二十

人物志

十一

楊俊字潔心增生天性純謹急功好義周鎮自道光年來屢經兵燹文教幾廢俊倡募創立靜遠書院及義學又屢捐助橋路各工光緒三年大饑俊約同志以課士餘貲於書院附設粥廠復籌款另設分廠全活數千人

李清魁性慷慨急公好義周口南岸當賈魯河衝水漲刷堤每告險工清魁與趙培成首捐巨貲修義渡口碼頭以遏水勢使無外溢周口商業以陸陳爲大宗市井販豎奸詐取利升斗出入不均創立陸陳公社定立條規每月較斗兩次有不平者罰金弊遂革

雷元忠性耿介道光十五年拾紙幣百七十餘緡守候失者不至徧張告白有陝商某追尋元忠詰察無僞還之分謝不受商感其義以輕財重義榜其門

李鍾銑字越昆八品銜咸豐二年捐銀七百兩買周口市宅歲租作義塾費成全多士諸紳勒石頌德鍾銑歿改爲積善局旋充入崇正書院又於張田寺設義塾脩膳皆出己財鄉鄰賢之黃鳴春邑庠生性和藹無急言遽色光緒初有祥符杜姓攜妻子避荒來此杜死鳴春葬之無賴輩欲嫁其妻鳴春力爲保護得免居二年歸助以貲又朱某上蔡人有養子定婚李氏養子歸宗李欲罷婚將成訟鳴春收作己子出資代爲成禮二十四年饑鳴春貸貧乏金全活甚衆多不能償家業因此蕭條卒不悔汾河隄削薄稟明邑侯葉自黃冲至隄子灣增築四里餘復疏濬修補知縣文獎以惠及桑梓匾額又積穀賑貧一方賴之年八十餘卒子應甲學堂畢業生充師範傳習所教員

李調字和鼎性慷慨喜交游咸豐間糾合同志修築永甯寨鄰里得所安居旋以五品藍翎候選知縣委辦周口河西釐稅西華知縣王鳳森曾給匾旌其門

李玉鳴字佩玖伯兄善鳴歿故與仲兄和鳴友愛甚篤咸豐間避亂居城親族逃難者厚恤之光緒戊戌歲饑時玉鳴任倉正稟請發粟以賑貧民又散放錢米窮乏得不流離庚子奉諭舉辦團練淮甯知縣程以玉鳴爲總團長辛丑沙河隄傾頽周口保甲局委員鄢邀玉鳴重加修築盛暑督工河干不避炎日工竣世仁匾其門仲兄子蔭桂字丹林光緒十三年河決鄭州灌入沙河周口以下隄欲崩蔭桂捐地二畝星夜培補幸保無虞李昉字發城性豪邁喜覽羣書尤廣交遊家道富厚每日高朋滿座酒食優渥未嘗有倦容周口沙河下游聶隄等處每當夏水暴發幾患衝決昉與族兄軒集衆培築日夜督工露宿河干工

竣勒碑紀之

何甲榮字孟起號觀亭廩貢生性豪邁不屑章句習秋闈屢薦不售咸豐八年粵匪擾河南所在糜爛時周口無寨遽遭兵燹人民流離甲榮情切桑梓與諸紳及弟熙宸集資修寨辦團練勇防剿兼施商民賴以捍衛後賊匪屢犯卒保無恙周口南岸卑下夏日水漲幾至潰岸甲榮與武舉李煥章同知任萬榮督修義渡口石壩百餘級至今人利賴之蒙河南撫軍嚴團練大臣毛以修寨辦團保衛巨鎮出力由都司保賞花翎同治元年又蒙直隸總督張以屢殲巨匪保豫要衝以游擊儘先補用不復出春明景和輒與詩人雅士相往還年六十一以積勞卒於家子二其增優廩生早世其壘河南撫標守禦所千總

李雲公字聖謨監生東馬坡地勢卑下每遇霖雨禾稼多傷雲公

商水縣志

卷二十

人物志

十二

佐叔維均疏通溝渠導水由淮境康家橋入褚河堅修閘口捐貲督工不避嫌怨又倡捐重修張五營關帝廟凡公益事多施助焉

王之楨字乾一歲貢生幼聰敏善屬文每學憲按臨試輒前列秋闈屢薦不售後進多賴造就同治初年倡濬東馬坡溝修康家橋水閘一方均受其利

李映離原名燮字參兩歲貢候選訓導幼承家學恪守程朱凡族中慶弔典禮皆取爲法咸豐初髮捻迭犯周口永甯寨僅存舊址不堪保衛因與族叔尙選從兄誥訓諸人各拆樓房輒修築寨垣映離捐金二千餘訓捐錢五百緡寨遂告成保障一方任萬里字搏九武舉奎從子也父綱讀書未遇援例爲國子生家富好施於宅西口築高閣多出己財閣下堅轟門閉嚴冬防禦

盜賊極資得力鋼殲萬里哀毀盡禮殯葬如制服闕捐縣丞加捐州判家居課子時劉公拱宸以進士宰西華丁內艱寓周濱萬里相與友善談當時急務謂周濱商賈輻輳財貨會萃一旦有變無險可恃實足爲憂萬里因度兩岸形勢邀衆紳商酌修寨以事出創舉種種碍難竟至中寢及皖亂作咸豐八年十月二十七日賊突至酷肆殺掠焚燒房舍殆盡賊退萬里及弟萬榮招各街鄉董設局定章先築土垣日夜督工不避風雨并將被焚市宅瓦石盡行充人工費數千緡九年十年賊復至無敢犯又聯絡各街募鄉勇六十名藉資保衛餉源酌收釐金十一年上憲欲提此欵萬里連稟痛陳不可挪用乃止萬里辦公十年餘載屢荷優獎賞給四品銜因勞成疾卒子恩齡孫學海

李天成同弟天申於周鎮新街南口倡捐修閣崇祀文昌以振興

商水縣志

卷二十

人物志

十四

文教又於閣下堅置閉閤以防暴客百餘年來周鎮屢經變亂新街獨未遭蹂躪多天成力也

李敦昉字蘊華聖府詩禮堂啟事廣製藥餌施濟鄉鄰平生留心隄防每遇險工爭先修築好勸人爲善立宣講社并掩骨修路諸善舉四方稱之

朱文增祥和慈善鄉鄰有爭必爲排解或有衣食不給求無弗與處骨肉敦厚無競子孫林立譽溢鄉鄰

柴紹孔字願學樸誠忠厚嘉慶十八年歲荒饑民嗷嗷待哺紹孔出粟四十餘石分濟鄉里全活甚衆里人德之贈惠及桑梓匾額

李和鳴字韻卿與弟玉鳴友愛極篤沙河南岸隄工捐貲助地諸多善舉以候選都司卒於家

唐光斗字耀南千總性端正好濟苦憐貧壽九十七子玉亭號琨
山事親以孝聞家居教讀四十餘載不計脩脯壽八十四孫鼎
新監生善岐黃術尤精痘疹喉科濟人甚衆七十四歲卒三世
厚德子孫玉立方興未艾

苗藍田字玉圃監生天性仁厚教子清彥早年食餼於庠旋貢成
均藍田精醫術有求者嚴寒盛暑不辭勞瘁行醫數十年不市
藥索謝惠徧閭里年屆期頤子孫繩繩咸謂仁厚之報

胡萬善字湧功慷慨好施每盛夏於周鎮禹王宮側施茶以濟渴
者嘗買延壽寺東院與劉振甲楊俊胡廷傑等勸建靜遠書院
子存三廩貢克承其事勸捐以資膏伙

朱文彬性長厚光緒三年大饑有魯山人楊明抱病乞食妻張氏
至文彬家求止宿明死文彬憐而葬之誌以輒收張爲養女後

商水縣志

卷二十

人物志

十五

數年明子發來尋親行次朱集訪得之見母悲歡交集居數日
負父骸骨同母歸嗣文彬子金鏡入庠人以爲好善之報

李樹本字敬敷布政司經歷蔡周子急公尙義有父風乾隆五十
八年重修巒宮廣惠堂養濟院樹本與弟樹屏捐百金督工不
辭勞瘁士論賢之

李維賀字儋之監生樂善好施常捐買周口義地以庠流荒道光
間褚河北岸被黃水爲災維賀具糧米六十餘石駛舟散濟沙
河水漲四里灣隄甚危捐千餘金修築民賴以安河南布政使
栗保獎八品以功襄康濟匾其門子愨公廩貢直隸知縣

趙培成輕財好義道光十七年河水暴漲周口新街正當其衝險
甚水退培成督工築隄高一丈長三十丈砌以石又修石級數
十層北禦賈魯河水勢襄事者李清章何容照等河干普濟寺

有碑記之

程立誠字葆真好濟人急同治癸亥有劉姓負王氏債百二十緡被逼甚急立誠憐之將已地四十五畝典於王代抵債歛族人廷秀因貧廢學立誠代備脩資三載旋入郡庠

陳萬田字廣業監生性誠樸家藏經驗良方製藥濟人無不立應如休息痢小兒急慢驚風婦人產後風等藥施數十年活人無數萬田病篤囑子曰施藥濟人吾生平所樂爾曹其繼吾志子泰然等遵行無違

柴體潤字澤躬精醫術施方藥濟人無數建修村北火神廟自出百餘金又修村西大路數里費百餘緡鄉人建碑以頌其德趙應山字靜占幼而老成讀書略觀大義於古今事成敗人物臧否無不燭照如神精書算會計縣署錢糧出入不苟事親能得

商水縣志

卷二十

人物志

十六

重闡歡丁內外艱皆盡哀禮家中落尋復舊業胞弟如山不理生業應山爲成室授產勸就商從弟崇光嗜學能文以膏火卒貢成均戚族待以舉火者十數家嘗爲妻黨王某婚娶以延宗祀鄰有張某窮極鬻妻資助之夫婦賴不離散交友以誠尤親禮賢士一時名宿如史文範張文侯王朗岑皆樂與友自奉甚儉爲子延師膳脩必豐其他廟橋路工諸善舉多贊其成年五十三卒鄰里無不哀悼婦孺多泣下者子三長明坤字順菴廩貢明方庠生

王心一字同德庠生兄振東字位震恩貢生學業淹貫兼通易卜星象繪有天文圖與李如璧爲知交心一性剛方尤慈愛咸豐初有郟城賽麻子自捻匪中逃至姚橋集人疑其髮長執之命在須臾心一詢其詳知爲良家子留之家十餘日與姪壻王孝

林同眠食後孝林因事至鄆西皋集被詰將殺之適遇賽姓援救得全性命天之報施亦巧矣哉心一年高志壯光緒己丑恩賜舉人壬辰恩賜翰林院檢討壽九十三卒

高勤字端敏廩生性溫和輕財好施咸豐十一年歲饑佐父施豆穀三十餘石米麵不計其數貧鄰多賴全活

李意公字敬修家素寒遭冬雪遇貧苦者輒分薪米助之乞丐至門有老弱疾病與以飲食貧而好施難矣

李維錚施鄧家廟地五畝續修臨川橋及沙褚河隄屢捐貲助工

胡萬彩字霞光庠生屢試不第因潛心醫學以藥濟人四十餘年未嘗受謝藥肆爭延聘之不就或問之曰藥肆爲利也醫以救人利人之危吾不忍爲年八旬值中秋閤家笑語月下愁然曰月再圓吾其逝乎已爾果然

李維賢字念齋歲貢生性慷慨遇人危難解囊相助鄰有路死貧人無賴子嚇詐地主維賢挺身承當人感其義厚謝之辭不受嘗令人擔錢他往詐言路遺其半置不問東西馬坡沙褚二水三面環繞惟西北隅未周咸同間戎馬頻來維賢因地設險稟官自高橋至四里灣築壁壘費二千餘緡後賊數至卒不敢越值河決上游復賴此爲保障至今鄉人頌之四里灣河隄削薄水漲甚險維賢晝夜督工墊欵數百緡李家橋圯改建以石晚年家稍落而好善樂施猶如常時卒之日人多太息流涕

胡明遠少偃蹇家徒四壁壯年懋遷稱小康平生最重族誼於先祠力爲整理一日病革招諸昆弟囑曰吾身後諸事不足慮惟本支祖塋歲祭無常欵嗣後子孫繁滋於報本追遠略焉弗與可乎余積貲四百餘緡望諸兄代置恒產得租以供歲祭庶幾

九原瞑目也明遠歿嗣子裕海遵遺命酌當市宅歲得租數十緡春秋辦祭品外兼可歲修塋域族人勒石以誌其義
葉昭先好施濟光緒四年大饑流民載道老弱多餓死昭先惻然憫之在鄧城施粥兩月約費五六百緡全活甚衆
王龍章居心忠厚恤孤憐貧光緒三年大饑族人亦多嗷嗷待哺龍章惻然日宗族雖遠自祖宗視之皆其子孫也忍坐視乎察其貧戶多寡計口授食由冬及春已糧已匱復乞糴於他鄉賴存活者數十家有貧不能嫁娶輒賙濟之
王東陽字春圃監生父臨章字文煥好讀書義方教子東陽性悃樸仗義疎財光緒二十四年歲饑東陽放豆七十餘石鄉里匾其門曰惠周鄉鄰兄東芳有傳
李師禹忍讓無爭每田禾熟任貧鄰竊取不之校有義舉慨與之

商水縣志

卷二十

人物志

十八

同治三年捻匪據尚店寨逼近縣境知府劉拱宸遣兵助討檄屬縣助餉師禹輸銀一千兩賊平以功賞給六品知州並賜功膺懋賞之匾

王文義存心忠厚有貧族名五十者凶荒餓且死文義使人扶至家飲食之數月族黨借貸不責償無德色子孫繁衍蒙道漸興
党浩齡字介眉監生急公好義惜老憐貧其尤著者同治初年創修陶公寨保衛一方鄉里感德至今思之

李佩性慈善施藥二十餘載耄年生子畏三勵志讀書弱冠食餼畏三倡辦團練有功蒙縣加獎

孫朝貴字殿卿性孝友兄弟怡怡鄉鄰感化近村周橋路窪每遇霖雨泥濘阻滯行人苦之朝貴倡衆培修又重修三官廟鄉黨稱爲善士壽七十九

張永祥字瑞甫監生忠厚樸實好施與樂爲人息訟解紛鄉里推爲長者處骨肉有恩家教甚嚴姊適王氏早寡甥炳揚永祥慮其年幼居城失教移之鄉延師教誨炳揚克體斯意閉戶誦讀弱冠餼於庠晚貢成均永祥歿炳揚思其德立碑誌之

趙倣字依齋歲貢候選教諭爲人謹厚謙恭友愛兄弟工書善丹青又好博古前代彝鼎籀篆諸法考證詳確知縣葉爾安創修試院與邑紳葉奉先葉德先屠以德葉慶雲等董其事且捐重貲越歲始竣繼又助濬汾枯兩河不辭勞瘁沿河隄岸增高加寬四十餘年不遭水患子若孫貢成均列膠庠者至今不絕

李天章字華漢性慷慨戚友有急必多方假貸以給之或不能償則累爲已債友人二子同入泮窘於財求助天章時將麥秋割地四十畝借令典之後遊學舞陽卒於旅寓訃至索逋盈門數

以千計皆爲友急難所虧也子三長毓英同治甲子舉人庚辰大挑一等江蘇知縣次擢英丁丑進士仕至典禮院學士有傳次延英增生援例捐通判

王凌霄字步雲監生世有令德高祖舒鄉飲大賓夫婦壽符八秩里人匾以杖朝重望父心田績學未售早歿凌霄方四歲母冷氏守貞教子延師課讀識敏才卓人多目爲偉器旋以匪亂廢學知縣汪重其才委辦鄉團修城守陴俱以身先同治壬戌僧邸駐師歸德檄郡縣供芻茭縣諭凌霄與傅成五解送往來賊穴幾瀕於危出使界首集尤冒險亂定知縣葉創建試院凌霄捐資督造力任其勞光緒丁丑歲大饑以辦賑出力獎擢縣丞又勸辦直東賑捐由同知賞戴藍翎平日補橋修路諸善舉多出貲倡首鄉鄰或有爭端多爲排解復偕同人立社倉以備荒

上憲以惠及鄉閭旌之子芳德字芝湘捐教職歷署裕州信陽
盧氏等學孫七人長鎮寰字伯清監生報捐知縣孝義克敦祖
病鎮寰服事湯藥衣不解帶者二載重修火燒橋竭力督工并
出鉅款辦工藝廠清鄉社及巡警車馬購書栽桑等任勞任怨
惜中年早世次鎮宇字仲啟庠生五品頂翎河南省立法政畢
業

王心一字仲誠性誠實貧而好施當粵匪亂官兵在東關散居民
宅一日從外拾一幼婦欲納之又欲賣之心一言不如訪其家
歸之多方婉喻兵始悔悟婦言河北某縣人去商三百餘里心
一願往徧地風鶴不計也果約其夫來攜婦歸遇凶荒見有鬻
子者心一不忍其父子分離傾囊給之一日進城聞幼子哭聲
甚哀問之言饑餓難行離家尚二百餘里心一爲乾餼十餘觔

並與錢以資其歸壽八十餘子五人皆賢孝幼子景曾入庠
劉振甲字冠軍監生慷慨好義周口自道光來屢經兵燹文教日
衰振甲偕同人勸捐創立靜遠書院並立義塾培養貧家子弟
光緒初年大饑振甲襄辦粥廠晝夜弗違又自捐綠豆二十石
助賑饑民其他救急拯災義行甚多林宗師以樂善不倦旌其
門子芾棠爲名諸生

李捷三世居趙集寨寨臨沙河同治二年六月捻匪夜備舟械欲
暗攻寨捷三窺其謀遣人穿寨作穴用大炮擊落賊舟無數賊
遁寨賴以全知縣聯獎給六品功牌

任瑞麟家貧慷慨好義居近任橋橋西路隄坎窞難行每逢霖雨
行人苦之近隄無土培築瑞麟僅有地八畝以四畝施工取土
培路鄰人顧九山感瑞麟義見橋址剝蝕捐貲三千餘鳩工修

補一方感頌建碑橋上以誌其德

李克仁家無中人產宣統二年白帝河決被淹者數百家與屠以和
各施米粥三日衆感其義亦多踵而爲之

李誠忠家赤貧光緒三年往南方服賈路經召王店坡拾遺金四十餘兩
候失主李允修李茶朵至問明原物交還同時有李平亂者赴周口拾遺金
二十兩知爲李經邦所遺卽歸之經邦以十金謝力辭不受又里人雷夢周
拾錢票一束訪失主還之人感其義贈重義輕財匾額噫拾金不昧人情所難
乃同時同地而得三人何此邦好義者多也

史邦傑性平恕好濟人急地百餘畝皆外佃於人時畜二牛以便貧鄰之用
亦存心利濟之一端也

郭名士監生仗義疎財遇人爭端婉言勸諭不解輒代備酒筵曲

商水縣志

卷二十一

人物志

二十一

爲講和負債難償者輒解囊助之

常錦字文齋監生性慷慨急公好義同治六年大水沙河堤岸削薄勢甚危錦與程國棟邵萬章各出已貲二百餘緡築修增高
瀕水居民至今猶稱頌之

竇明禮通醫術善治痘疹有求必往不憚勞瘁小兒被救濟者無數
施藥施方不名一錢曾醫一富家兒立起沉疴謝百金力辭不受
人稱其義

党振南附生性純謹多善行每逢朔望宣講聖諭十六條諄諄勸戒
不憚勞苦並修補橋路凡利益事皆樂爲之

張魁元從九品家計甚薄而仗義疎財周口二板橋工魁元捐錢二十五緡
次子際庚有父風遇貧窮必周濟之光緒三年大饑自顧不足乃施穀五石
蔴餅三十片以給鄰里同時有張華田

亦好善施穀八石董盤古會施茶三年

趙世卿性質樸好善常施藥餌以濟人積久不倦後舉四子均屆
耆耄孫耀先早入邑庠

婁宗堯字景唐性純厚好施予光緒三年歲饑十室九空宗堯廣
種菜蔬以拯貧困嘗賣雜糧置碗困內每斗外加一碗鄉里稱
之曰婁一碗

李殿臣字棟材武庠生性寬和與弟殿傑相友愛周恤窮困無吝
色光緒三年歲饑輸銀三百兩以救急難

趙俊英光緒二十三年捐助學堂經費一百緡蒙獎六品銜

王殿選字君召國學生通達事務治家井井有條篤於倫常父母
早逝喪葬盡禮兄弟同居常怡怡如諸姪教之耕讀好義舉善
排解凡橋廟各工必捐貲贊助遇戚友鄉鄰口角相爭必委婉

商水縣志

卷二十

人物志

二十二

勸解子四長振方同友人結社修橋墊路次炳坤業儒

蘇青榜字題名性溫和好義樂施家庭之間常雍雍然興龍集後
有季橋年久頽壞光緒辛卯倡捐修葺又墊橋南路里許鄉里
有口角從中排解自備酒筵了之至今人稱道焉

王德一素清廉光緒二十年道拾遺金百五十兩失主上蔡林堂
集張姓德一詢而還之張欲報以財並爲建碑彰其義固辭不
受

朱冷修性廉介好善樂施施茶修路掩骨等事力行不懈雖遠出
未嘗受人飲食見善勇爲不給則鬻已田以繼之家業漸耗晚
年衣食維艱不少悔爲善益力平生所用鐵鍬易十數次盡爲
磨穿時人號爲朱瘋子年七十八自言七月一日往任陝西澤
州府城隍人皆笑之至日與家人作別恬然而逝

魏承緒仗義疎財同治間修十字河橋費數千金公欸不給將已田百餘畝盡售與人以助橋工又借支王廷美四百金廷美以承緒因公致貧亦不追償承緒困頓亦歿毫無怨言功竣並未樹石鄉鄰惜之

李應倫字明五光緒三年歲凶家計不足作商襄城路拾紙幣四千候失主至還之又嘗糶穀於市人誤多與錢三千餘應倫歸家始知如數退還鄰有孀婦屈氏老且瞽無所養應倫日給湯飯死爲買棺以葬其廉節慈惠多類此

姜應舉性忠實遇貧窮輒周之無吝色修補橋路每夏施茶路側終身不懈

趙永瑞性謹厚修補橋路施藥惜字樂行不倦

李越朋原名碩公增生束髮受書學有淵源言動皆循禮法尙經

商水縣志

卷二十一

人物志

二十三

世之學祖籍西華捐金修衍疇書院督工勤勞教子姪讀書循循善誘咸同間捻匪倡亂民力困乏遇婚葬失時者越朋屢出貲助之光緒三年歲歉佃戶族鄰按口周濟歲熟歸還不受也李維冉字亦耕性慷慨家無中人產鄰里有饑寒者常資以升斗遇有口角爭多方排解或設席出貲以調和之訟端多賴以息唐獻廷性慈善人有困難樂爲救援遇修橋隄捐貲助工重修永鄉寺施錢二百緡壽七十餘臨終有私藏十五金猶囑其子推施焉

謝振甲監生急公好義嘗與歲貢史書楷趙國藺恩貢王聚典歲貢趙崇光等於城內文昌宮創設文富書院培養人材多所成就又於村居左右溝渠橋廟隨時疏通修補不遺餘力

王麟祥字瑞甫世守儒業曾祖霞字蔚生廩膳生祖會瑩父坤兄

第五人家道漸落習工藝爲生計嘗以未獲讀書爲憾母氏何有賢行麟祥數歲就傅每典質以資脩費麟祥仰體親意力學弗懈值咸同亂徙家逃避學中輟亂定田廬蕩然棄儒就賈家漸裕性好施與有負債者輒焚其券事親至孝親體偶不適憂惶如不終日或意有不懌卽長跪引罪旣解乃已兩居親喪皆哀毀骨立情禮俱稱子三觀釗觀鈞讀書未成仍業商觀成性敏嗜學教督甚嚴弱冠入庠旋登庚子辛丑並科鄉薦考歸郵傳部麟祥歿觀成累遷主政

屠以和字仲節監生兄弟三人友愛甚篤尤好濟急恤難宣統二年河決白帝災民嗷嗷待哺以和日集老弱孤寡計口授食全活無算子祿田邑庠生

王震甲字東木性寬厚好施予少習吏事而精於醫縣主孫公保

商水縣志

卷二十

人物志

二十四

爲吏員俾充官醫生邑中善舉多捐貲助成城內向無牛痘局震甲約同志倡捐聘痘科每春開局點種有小兒或兼他證震甲親往調治兼施藥餌局中雜費皆爲擔任如是者數年

胡存咸字樸齋慷慨樂施光緒十三年河決鄭州災及下游數百里周鎮適當其衝存咸僱舟載糧以濟災民全活甚衆鄰族有以急難告者立予之冬月施衣放粥安徽胡穀陽工丹青寄食其家十餘年歿則殮槨歸葬東河候補王某因公來鎮病歿購地葬之熱腸古道一時賢士大夫樂與訂交座客常滿有孔北海遺風

王泰平監生光緒三年大饑獲嘉人鄭某流徙於此知泰平乏嗣願代買妾未幾攜二童男女至年皆十五六擬賣女時泰平已納筵室將他去潛問女男毛姓女毛聘室鄭其姨丈也誘與避

荒不知其欺已也因泣下泰平憫之收作義女毛在近村爲傭
資鄭使歸尋爲男女成禮並通信毛家召之歸毛夫婦潛然不
忍去以德沛遐方額其門逾年泰平妾生一子人以爲陰德所
致

顧九山字連峯監生同治二年知府劉拱宸創辦鄉團九山捐銀
五百兩光緒間以千金助修鳳臺文富靜遠各書院加增膏伙
以示鼓勵邑建高等小學堂首捐百金二十三年大饑城廂鎮
各設粥廠九山慨捐二百餘金以救饑民重修火燒橋任家橋
費錢數百緡汾河壅滯躬率佃戶開濬數百丈鄰族鰥寡孤獨
歲資助之子民岩以河工樂輸鉅款保知縣分發江蘇

王補玉字澤遠庠生性廉介精醫術無遠近求無不應並施藥不
索謝曾孫東芳能繼其志

商水縣志

卷二十一

人物志

二十五

劉天來字鴻恩原籍陝西華陰家貧甚從父惟照來商水家焉性
篤實不妄言母患癰晨夕侍奉不離側數年如一日丁母艱哀
毀甚友人勸慰始節哀殯葬以禮光緒丁丑歲凶有武陟人王
姓夫婦侍母就食商水母死無以殮將鬻女天來見而憐之買
棺以葬王甚德之天來教子甚嚴嘗勸人日禾荒一季子荒一
輩雖諺語有至理焉

王成德字希賢監生嘗倡修青泥溝黑土橋並青龍河堤工縣主
文以惠及桑梓旌之子夢蘭光緒間以賊工出力獎五品銜
周元龍好善樂施捐某廟香火地六十畝義地十二畝

婁百朋字錫天監生性篤實嘗倡修三合寨同治光緒間枯汾二
河兩次疏濬百朋皆與有力縣主文以惠及桑梓匾其門

郭巨源舉人好學不倦嘗倡建文昌宮於邱生祠士子多來肄業

一時成就甚衆

樂逢萱監生性慈善與人交推誠相與遇貧乏多調之有貧族不能葬慨助之貲同里延師課讀多以供饌爲難逢萱獨任不辭鄉鄰有爭必爲排解而後已年八十卒

葉卿雲字星聚布政司理問性沈毅少讀書有大志不屑治舉子業世居鄧城鎮光緒間沙河泛漲鎮當其衝勢岌岌因稟請府憲吳縣主李親臨勘驗卿雲條陳築堤修壩事宜深蒙吳李嘉許卿雲卽倡首舉辦日夜經營鬚髮爲白越三年功始竣十三年豫東洊饑陳屬西商爲甚西華知縣鮑勸捐紳富助賑卿雲慨捐市斗穀二百石上憲獎敘鹽提舉銜是秋鄭州決口太康一帶被災尤甚卿雲僱巨艦派親信家丁攜帶米糧駛往拯濟三月始返費數百金十四年捐賑二百金賞戴藍翎二十四年

商水縣志

卷二十

人物志

二十六

捐本城粥廠三百金又在本鎮設立粥廠鄉里感之稟請學政朱賞給河潤均霑匾額邑創修高等學堂捐二百緡至戚黨族鄰賙卹不可勝紀渦陽之亂人心洶洶卿雲倡捐二百緡修補寨堡平日靜處一室流覽方書悉心研究而瘟疫門尤精慎於擇交嘗曰士得一二知己可以無憾教子最嚴必令其近正人守禮法擇先正格言書於版懸之書室誠諸子身體力行妻劉氏有婦德子三爾昌乃昌皆庠生世昌監生

朱連元字捷三天性孝友存心慈良雖喜因果而志在勉人爲善創立塾路會到處宣講醒世作勸人歌及小說以警世人嘗捐銀四十兩交王某爲修路費昧之不較也四方數百里咸以朱善人稱之知縣文獎給六品功牌壽八十九無疾而終

李欽字敬庵候補巡檢以賑功賞加五品銜父景泰好士愛作草

書母劉氏早卒事繼母鞏能盡孝養愛異母弟甚篤幼讀長丁
亂離棄儒歸商持家勤儉性骨鯁弗趨勢利恒面折人過喜報
不平事尤善排解市井賴以無訟知縣李普潤李煥新廉其才
委辦周濱南岸寨工局事極稱職寨瀕河盛夏水漲危甚欽與
諸紳急購石搶險得無虞天津黃世煦辦淮商鹺務僑寓周濱
仗義疎財與欽友善以慈善事相託欽欣然任之周訪孤貧老
病無告者月給以貲死不能葬者助之棺光緒庚寅陳秋圃大
守充周濱權使奉檄辦理保甲召欽相助欽與沈師齋大令暨
諸紳繪勘地圖釐訂章程無不悉當渦陽之亂周濱戒嚴欽與
諸紳練勇防堵人心以安戊戌己亥歲洊饑人相食流民麇集
諸紳約欽籌設粥廠全活無算繼以善後事宜盡委之而欽疾
作矣猶竭力籌畫精神益憊逾二年卒壽六十項城進士張鎮

商水縣志

卷二十

人物志

二十七

芳銘其墓子二介祐介祺拔貢孫元錫入邑庠充本省政務廳
科員元鏡元鑄元錄元鍾俱業儒

張廣仁性樸實與物無競光緒甲午靈霖爲災李橋北水大沒路
行者病涉廣仁以爲憂遂持鋤獨往修築或難之廣仁晝夜不
息有飲食之者謝曰吾有乾糧無須此越二年工卒竣嗣修路
會繼起實廣仁爲之倡也

徐有耀先貧後富性慈善鄰族貧不能嫁娶及喪葬者助之金
王應林性慈善好施濟夏日施茶以爲常妻張氏亦好善壽九十
餘同日無病而逝鄉里咸謂爲善之報

王世棟性惇篤貧而好善夏施茶水率子孫修補橋路以爲常
喬金嶺倡立路會勞心勞力積久不倦遠近善士爭迎致之由城
赴周口路極窪率衆極力增高三月始竣行人便之知縣文獎

給六品功牌

李士林與山西商人程某爲友程病篤子親文方二齡召士林泣囑曰吾妻老子幼商業家務並委託焉言訖而歿士林一身任之十數年毫無私營親文成立即將財物珠還潔身歸去親文思其德贈匾曰耿直可風街鄰感其義匾曰仰荷碩德程冠儒通醫術嘗施藥濟人同時張秉碩施風藥二十餘年王俊榮字秀山急公好義同治六年同邑紳趙倣修沙河隄挖汾枯二河督工數月不懈知縣葉稟賞六品功牌子效顏有父風光緒二十四年大饑幫辦周口粥廠活人無數次子效曾辦理保甲二十餘年均經縣請有保獎

李馨芝字化庵歲貢生幼讀書卽知勤奮弱冠入庠旋食廩餼家居課徒從遊日衆貧者不受脩資諸弟姪賴以成就入庠食餼者數人生平敦品勵行非義一介不取晚年注意正學手不釋卷周口南隅舊有樂善社惜字掩骨點牛痘施茶藥後人廢弛與執友劉湛遠王慎典復興此舉添設獵道軒文社每月兩次會課文藝外以德業相成過失相規爲宗旨蓋遵藍田呂氏鄉約法也從弟性麟夫婦早亡遺幼女馨芝撫養擇配備妝奩嫁之舅氏老而無歸迎養於家事如嚴親數十年歿後奉柩歸葬子名珂庠生能世其家學

王魁元字占鰲勤慎耐勞熱心公益光緒十三年鄭州決口魁元在河工出力蒙保外委二十三年歲荒周口設義賑爲粥以食饑民魁元出力尤多蒙保五品頂戴儘先把總其他修寨築壩施棺木施縣衣諸義舉極力贊助實心任事保甲局委員鄢以樂善不倦旌其門

支振翥家素裕踰四旬無子爲善甚力五十後得一子名祿賢日者多言其不壽及長有父風見義必爲夜夢神人捧白簡增壽二十年醒而異焉族人支得祿夢亦相同後果驗二人壽皆八旬

程金嶺字寶峯監貢性敦實輕財好義光緒十三年黃河開決被災之民流離失所金嶺遇之必爲謀食謀居竭力相救

孫廷山性孝親歿每飯必奉先而後食又好施與修補橋路不惜財力夏日施茶以濟行旅數十年不懈

馬貞元監生性豁達仗義輕財邑中大小義塾無經久費貞元於光緒五年偕弟寶元捐制錢六百緡經知縣左立案交裕盛典生息作塾師脩膳費後義塾改爲學堂此欸移作學堂經費其他好善樂施不止一端

商水縣志

卷二十

人物志

二十九

程廷周性誠樸光緒丁亥歲饑有西華流民王氏姑媳乞食至譚莊遇雨難行廷周憫其苦留止數日以小車親送之歸王子感德親來拜謝

楊新春好善樂施村西南舊有橋每傾圮自行修葺路有窪處輒負土培之遇貧民罔不周濟

魏虎清性忠誠村鄰蕭步雲家極窘虎清與地三十畝令種以養二十年不收稞租年九十九無疾而終步雲感其恩歲時墓祭以爲常

李應兆性好善修道路施茶水力行不倦立社宣講諄諄教人十數年如一日幼失怙恃以未盡孝爲憾修父母神主上及三代朝夕奉事甚虔婿某父母俱無家業凋零應兆招至家多方教養俾能自立

牛鑑遠字獻廷貢生急公好義同治二年創修永和寨鑑遠施麥
秸萬餘斤又捐錢數百緡子振宇武庠生振鏞監生光緒庚子
歲饑復捐金賑濟貧民

李維田字藍生監生恬退和介與鄉鄰處向不爭論是非家僅小
康戚族借貸不稍吝精眼科一經用鍼應手取效向不受謝家
近沙河以沃壤之田十數畝取土築隄掘爲溝壑毫不愛惜識
者難之

王中寅性忠厚急公好義村北有神堂一座歲久傾圮光緒二十
八年中寅獨出五十餘金重修又屢墊廟前大路里許以便往
來里人立碑以誌其義

李世恭字壽銘增生讀書過目成誦善屬文性尤急公邑車馬巡
警雜差歲得萬餘金商民苦之世恭稟縣詳請隨糧徵收公私

商水縣志

卷二十

人物志

三十

兩便又偕同人辦實業社初級學堂一切新政極力贊成惜天
不永年三十餘歲卒

牛嫻少孤貧傭於李姓忠厚勤謹五十餘年李家零落孤兒寡母
度用維艱牛不計工資勤勞如故老死李家主人感其義爲樹
碣墓側

周之德字敬甫庠生事親孝與兄於德克盡友愛精醫術求無不
應屢次襄理賑務及修隄諸事邑侯孫多祺以急公好義旌其
門

張念曾字奉先附貢考取鴻臚寺序班性剛正不輕然諾辦鄧城
地方公事二十餘年每遇捐派皆秉公潔己人皆信服鄧城鎮
修寨堡築河隄念曾捐貲贊助不辭勞瘁又善爲人息訟解紛
與從弟蕙蘭鄉里同以長者稱之子姪輩皆敦行好義不墜家

聲

范樂水字智夫歲貢讀書能文兄弟愛友甚篤光緒二十三年大饑捐百金賑濟餓殍續修雙橋施輒三萬其他急公尚義多類此

李延英字賓閣增廣生援例捐通判幼從兄毓英擢英學及長二兄皆宦遊延英棄舉業獨操家政克儉克勤積久成巨富光緒丁亥黃河決鄭州大溜南趨入沙河周口南岸瀕於危延英與諸紳增築吳公隄戊戌歲大饑在關帝廟陸陳社設立粥廠全活多人是年冬渦陽亂作人心洶洶寨垣殘缺者皆修補之次年春設粥廠於西寨外又築石壩於安瀾門外北岸二板橋幾傾圯延英糾合三岸好義者協力重修逾年告成辦理寨工局任勞任怨充商務會長爲商界興利不留餘力民國初年土匪

商水縣志

卷二十一

人物志

三十一

肆起呈請各上憲改鄉勇爲保安團得安無虞壽六十七子國琳入邑庠國瑗蔭正四品國珩

王奇峯誠樸好善光緒年間偕王坤元吳文正在吳樓創設牛痘局點種貧家嬰兒每歲保育數百醫藥經費由局中擔任奇峯辦十餘年鄉鄰頌之奇峯卒後王坤元吳文正接辦又數年梁棟材字廷選性好善少貧讀書未成爲縣吏掾同治元年勝宮保駐札周口棟材司書以辦公保八品銜常代和春施藥局勸捐錢八十緡自施藥三十兩家居歲儲藥餌施送鄉里全活甚多鄰人陳祿陳澇及楊振清之妻死家貧無貲棟材皆代購棺木殮葬其他義行多類此

李同僚字協恭監生績學未售因輟讀理家政數十年成巨富光緒乙巳縣立高等小學堂同僚捐銀百五十兩作爲經費邑侯

謝爲請獎丙辰續修邑乘同僚又慨捐洋五十元其他好義類如此壽七十九子夔龍皆循謹

王璣性好善每歲農隙自備飲食身率佃戶修葺道梁數十年無稍懈又倡捐續修東嶽廟時有王善

竇雲亭字嵐生庠生品行端方精地理之學好義急公凡社倉鄉團多賴助理咸同之亂雲亭首先倡義與監貢馬文炳黃振清等創修霧臺寨極力守禦保全數十村人皆德之至今思慕不置云

張連魁字星垣候選府經歷性慈惠好施與長習岐黃業精於外科凡有險證一經調治皆獲速效貧人患病者予以藥膏丸散向不索值因是家中落然急公好義遇有善舉必竭力捐助至老不倦

商水縣志

卷二十

人物志

三十二

方技

清

李立本字起生生於明季隱居不仕托業於醫窺岐黃之奧生死天壽一見而決不爽毫髮時以神醫目之西華王都憲夫人病其子方在史館延太醫院名醫二調治兩月不愈後請立本至一藥而痊衆拜服時有酒徒某見立本名重不服以手試日爲我診之立本診視良久大驚曰腎脈已絕可速歸其人行未數武仆地而亡一日在胡某家座中有張姓曰君素稱神醫看我病否立本診曰君病可危當在二年後驗然尙可醫因與之方囑令必服其人腹誹竟置之後二年立本復至胡某家胡命邀張導飲立本訝曰張君尙在乎此其時矣胡使至張方仰臥聞立本言甚喜急起方着一靴氣一絕矣其神異如此

王夢桃字介眉監生孝友純篤家庭雍睦少聰穎倜儻灑落不爲俗情所羈精琴棋書畫有小齋日夕坐卧其中尋道子山陰之奧客至手談一局不計勝負去則閉戶獨酌或時理絲桐以自娛知縣李新猷匾其齋曰雅致怡情以上舊志

王木字近堂監生乾隆時人事蹟未詳善行書得趙松雪筆法賞鑒家多珍藏之

足明禮精痘疹延無不至活人無算未嘗市藥索謝有以財物餽者堅卻不受鄉鄰德之

李昭字旭亭性坦適不慕榮利門前有柳數十株號柳園主人善丹青尤工墨龍得之什襲珍藏有求者恒數月不成或譏其遲曰龍神物畫必神聚我神足再俟天氣氤氳雲龍升騰之際著墨無不神奇如之何欲速也識者謂爲精妙之論

商水縣志

卷二十

人物志

三十三

柴繼孟讀書不求聞達托業岐黃治瘡疽尤精不市藥亦不受謝有求醫者寒暑不避遇極貧代出藥資且給以米粟汝寧府王某病更數醫不愈子赴周口備後事聞繼孟名介友哀求時年終雪冷繼孟慨往診視日此小腹癰也服藥數日遂愈謝以巨金峻拒不受如此類者甚多

魏鈺字連璧性寬厚精岐黃術雖險證多獲奇效一時有神醫之稱子碩儒庠生德馨孫孟雲鼎臣皆以醫名曾孫體元早年入庠廣求良方濟世風雨寒暑不辭勞瘁

苗靈著字卜堂庠生倜儻有才書法工柳精岐黃術治瘟證應手輒效得力吳又可瘟疫論暨瘟疫條辨諸書生平傲骨嶙峋性情間雅不屑與流俗伍暇則種菊養魚以自樂

趙文山字松亭幼好學穎悟絕倫六壬奇門無不洞悉兼通兵法

習外科濟人甚衆至今稱之

王世龍字雲從號懶道人善畫墨竹晚年白髮朱履逍遙林泉興之所至隨筆揮灑人爭寶之壽八十餘

王金書號松山家貧力學工草書爲簪花格筆資圓潤深得趙松雪家法

李繩檢字述祖工書翰精岐黃鄰人貧病不能自醫者繩檢給以藥不索值一時稱善士焉

王殿軾字梅溪幼讀長就商遇潘東旭丹青妙手也就學焉遂工書畫尤長於梅蘭好爲水墨不入時眼存者寡矣

李篤慶字錫光善繪事花卉得憚南田法翎毛昆蟲無不肖妙真寫生佳手也嘗繪玉堂富貴圖通景二十四頁筆筆有法秀潤靈活直逼古人山水人物亦超絕一時

商水縣志

卷二十

人物志

三十四

李渭公字開周監生精於醫應手輒愈未嘗索謝貧者施以藥餌遇危證雖寒暑風雨必往全活甚衆嘗曰醫小道也苟慈祥爲心於人未必無濟又戒子姪曰醫不精易於殺人汝輩宜安耕讀本業萬勿淺嘗試之接人一團和氣靄然可親年八十餘騎驢道士蒼顏白髮望之若仙子孫繩繩人謂厚德之報

張海成性仁厚好施濟精醫術藥儲精良凡求診者無貧富咸不較值人感其德光緒初與姪研理約朝義陵鑄銅鐘以獻工人作僞擊之無聲自恨氣結如癡及抵義陵朝拜訖迷所往同人徧尋無蹤月餘忽自外歸鄉鄰爭來問視自言初失道時見一道上赤足披髮執黃旗導前一夜至黃陂後躋南嶽留止月餘同時有兩僮秉燭送至村前由是醫術愈精求診者日盈門應手輒效不收藥資問以磁缸水洗目立愈家產賠累殆盡不計

也

郭慶甲精岐黃衆舉爲醫官訓科以上採訪稿

流寓

晉

任諒字子諒眉山入徙居汝陽九歲而孤舅欲奪母志諒挽衣泣曰豈有爲人子不能養其親者乎母爲感動而止力學自奮年十四登高第累官龍圖閣直學士知京兆府

河南通志

清

解濬思字心泉祖芳銘字蘭坡貴州都勻縣人嘉慶十年由舉人任商水有循聲以積勞卒於官乏資斧櫬歸眷留不克養有戚誼某需次汴垣往依焉濬思與兄文思俱聰穎過人工詩善書貫祥符籍入庠文思旋逝父母亦相繼棄養濬思孤貧復移家

商水縣志

卷二十

人物志

三十五

商水爲義塾師脩脯不足供饘粥知縣葉爾安知濬思耿介訂莫逆交於義塾添設芹香社文課加增館穀聘濬思兼主衡文事多所成就或知其與官有舊欲干以私必正色嚴詞拒之嘗曰我輩讀聖賢書須窮且益堅冥冥墮行自問何安光緒庚子卒壽九十三子敬之早世無子

陶瑞麟江蘇勾容人嘉慶間遷居商邑巴村鎮性恢豁好施予咸同間髮匪擾亂流民絡繹道路瑞麟惻然憐憫出貲濟之月餘始止費一千餘緡又精岐黃術貧者卽予以藥有求診者徒步行不受藥資

喻光世字立三先世鄂省江夏籍來商遂家周濱已五世矣少穎異性極孝父尙義字純修業儒嗣業陶朱仗義疎財親鄰有婚喪求助者無弗允光世從項城邵紹康先生學日夜攻苦數年

頗有得嗣又肄業大梁補祥符縣學生性不諧俗嘗語人曰生不能抱聖賢之志拘拘於章句之末博取富若貴乃俗儒耳吾恥之遂於家宅東另置一院獨居潛修有子四長嘉祺次嘉斌已成童課之讀朝夕趨侍親側父歿喪葬悉遵古制商業託友經理家道日落不以窮困動心母于氏嚴而有節光世與妻張氏自茹苦供養無缺甘旨每外來先至母室揖曰兒歸矣母晚年失明光世極力延治衣不解帶藥必親嘗數年不倦母有所欲必竭力招致恐母寂寞必婉言解頤平居常掩內閫男不擅入女不擅出家庭凜若法廷教授諸生務令見諸躬行有周生過訪問靜養之旨光世舉四箴細推之且曰須遵鄉黨篇行之久自有得蓋言養靜於動也子嘉麒早天嘉斌字輔臣讀書慧甚父歿以貧故與弟嘉明皆就商而志不忘學會上丁嘉斌往

觀禮見祭器殘毀不堪適用怫然曰禮器不備吾輩讀書人責也慨解囊資二十緡購祭器燦然俱備

胡濬灝字居波原籍浙江山陰高曾皆宦廣西郡守有循聲祖任廣西荔浦縣丞父啟桐援例捐佐貳赴都註選抵商水遇雨道阻遂寄月焉咸豐間濬灝甫數歲父母相繼棄世一弟一妹皆幼穉孤苦無依有胞姑適四川李姓亦宦裔夫亡無子歸母家撫育三孤濬灝少從學解濬思讀書勤奮稍長習岐黃業尤精眼科後又應義塾師濬灝念姑母撫育恩深孝養倍篤脩贄所入日供甘旨務博其歡或有不豫必跪而引咎姑喜始起姑有疾藥必親嘗病劇焚香祈禱願以身代及歿哀痛幾絕竭立營葬每逢諱日必率家人詣墓前祭奠數十年不懈嘗語人曰古雖無姑祔廟之文然無家可歸吾卽以事父母者事之以報撫

育之恩耳

王逢 原籍山西陽城人性廉介初在周口鎮司義盛典會計以家貧該號銀三十五兩義盛典尋歇業逢哲欲歸銀而主人杳不知所之劉玉亭與主人有舊遂如數付託告曰得歸且歸不然充作善舉仍用義盛典名玉亭允收卒無歸所盡以此銀分捐城東關火神會及玉皇廟東橋路各工復自施錢三十串以葺事鄉里稱二義云

錢仁長蘆商人修廣惠堂輸銀百金乾隆七年又捐麥種五十石巡撫部院旌之曰不私其利併列入彰善坊以示風勵

舊志

馮泰觀字明遠湖北黃陂縣人以商業起家周鎮邑孫家嘴舊有草橋通衢也咸豐間遭匪折毀泰觀慨出鉅資改建石橋事半而橋傾折又易以石椿數年工始竣費七千餘緡鄉人欲建碑

商水縣志

卷二十

人物志

三十七

表德不受上書無名氏卽其人也

黃世煦字杏樵天津人歷任澠池南召光山知縣加捐道嗣以辦淮商西鹺務僑寓周鎮敦厚寡言好善舉光緒間河決鄭州周口北岸淹沒殆盡世煦倡首賑濟紳商繼起活人無算又捐入靜遠書院銀五千兩錢五千緡稟撫院立案交當生息資士子膏獎其外施棺材綿衣諸善不可枚舉至今猶嘖嘖人口

鄢世仁字守之河南候補知縣光緒間奉委辦理周口保甲寬嚴交濟勤儉可風創立樂善書院考課士子又設高等小學校十餘處士民感戴周口三岸均有德政碑

以上採訪稿